

四庫全書

集部

欽定四庫全書

集部

兩宋名賢小集卷一百

四十七至  
五十四

詳校官中書臣閔思毅

助教臣常循覆勘

總校官編修臣王燕緒

校對官編修臣何循

謄錄監生臣任相

欽定四庫全書

兩宋名賢小集卷一百四十七

宋 陳 思 編

元 陳世隆 補

岳忠武撫藁

岳飛字鵬舉相州湯陰人宣和間應真定宣撫幕  
累立戰功南渡歷少保河南北諸路招討使進  
樞密副使封武昌郡開國公罷為萬壽觀使為

秦檜所陷殞大理寺獄淳熙六年賜諡武穆嘉定  
四年追封鄂王淳祐六年改諡忠武有集

從駕遊西內應制詩

勅報遊西內春光靄上林花團千朶錦柳燃萬條  
金燕繞龍旗舞鶯隨鳳輦吟君王即天地化育一仁  
心

題翠巖寺

秋風江上駐王師暫向雲山躡翠微忠義必期清塞水

功名真欲鎮邊圻山林嘯聚何勞取沙漠塵飛定破機  
行復三闕迎二聖坐看席捲盡擒歸

魏石山龍居寺

魏石山前寺林泉勝復幽紫金諸佛像白雪老僧頭潭  
水寒生月松風夜帶秋我來屬龍語為雨濟民憂

遊金山

第一泉頭過幾日黃花猶待客重來男兒有意扶中國  
不斬樓蘭不易回

題池州翠微亭

經年塵土滿征衣  
贏得尋芳上翠微  
好水好山觀未足  
馬蹄催趁月明歸

送紫巖張先生北伐

號令風霆迅天聲  
動北陬長驅渡河洛  
直擣向燕幽  
痛飲黃龍府  
鏖兵木葉樓  
歸來報明主  
恢復舊神州

華嚴院

手扶竹杖訪黃龍  
舊穴空遺虎子踪  
雲鎖斷巖無覓處

半山松竹撼秋風

寄浮屠慧海

湓浦廬山幾度秋  
長江萬折向東流  
男兒立志扶王室  
聖主專師赴國讎  
功業要刊燕石上  
歸休終伴赤松遊  
丁寧寄與東林老  
蓮社從今著力修

池州翠光亭

愛此倚闌干  
誰同寓目閒  
輕陰弄晴日  
暮色隱空山  
巖樹蕭騷外  
征帆杳靄間  
吾雖江上老  
心羨白雲闌

題新淦蕭寺壁碑

膽氣堂堂貫斗牛，試將大節報君仇。  
斬除元惡還車駕，不用登壇萬戶侯。

過張溪贈張完

無心買酒謁青春，對鏡空嗟白髮新。  
花下少年應笑我，垂垂羸馬訪高人。

乩上詩

臨安西溪軍寨子弟請紫姑神  
王降乩書此宛然平日真跡

經略中原二十秋，功多過少未全酬。  
丹心似石今誰愬，

空有遊魂徧九州

歸赴行在過上竺寺偶題

敵騎犯京闕駐蹕大江南  
二帝雙魂杳孤臣百戰酣  
兵威空朔漠法力仗瞿曇  
恢復山河日捐軀分亦甘

兩宋名賢小集卷一百四十七

欽定四庫全書

兩宋名賢小集卷一百四十八

宋 陳思 編

元 陳世隆 補

盤洲集卷上

洪适初名造後更今名字景伯皓長子紹興十二年  
中博學宏詞科孝宗朝歷尚書右僕射同中書門下  
平章事兼樞密使提舉太平興國宮卒諡文惠有盤

洲集

方福州生日行

雪風高高雪如許海門潮生浪吞浦  
郎罷攜行街西東到處歡然聞好語  
舊日大官多養高民詞獄寄充官曹  
橫行阡陌喧夜鼓催征關市析秋毫  
只今事事無長蠹五月政成歌召父  
尺一方來問鳳儀魁三快刷聯鴛羽  
三山岌業摩曾空便是方丈蓬瀛中  
他年圖畫凌烟了却向山中訪赤松

雪詩用晁無忌韻

密雪舞冬晝祁寒友夏炎竹枝低未濕梅萼瑩先霑怯  
冷昂肩立欣繁矯首瞻隨風方北渡際海必東漸軒簸  
來如糝繽紛勢轉嚴枯荻新點綴曲砌巧增添伺隙花  
穿戶承甕箸插簷高飛迷皎鶴夜影逼清蟾砧淨綃橫  
石窓虛粉雜奩岷丘千壁碎武庫五兵銛烟徑楊吹絮  
香蹊蜨奮髯鯨鯢缺骨腐鵠鷺野翎爛白髮秦人遯龐  
眉漢尉潛漬蠶功孰及平地瑞初占窖卧行人節門局

志士恬已甘穿履困奚避割璵嫌醉慕雙螯畢寒懷五  
袴廉飄飄疑宓女刻畫謝無鹽河澗凝新浪峯高失舊  
尖山陰賓欲返淮右寇將殲穆滿三章著桓溫五板兼  
君恩捐衛粟天意絕齊痞江上蓑堪畫籬間斃可覘客  
觀眸已眩兒咀手頻拈足沒尋萱履腰閑刈藿鎌馬馳  
毛愈素鳥喙首難黔凍折騷人筆光臨織婦幃螟缺寧  
待火疫癘詎煩砭甲長寒蔬細根肥宿麥纖年豐雖欲  
頌神助媿江淹

題陳體仁判官休齋

翔纓飄組蓋中留綠水芙蓉且漫遊過耳從教千不是  
處心渾欲一宜休爐中異馥非多愛架上新籤弗外求  
寂寂掩扉無所事飽聽風竹韻涼秋

次韻題謝景思少卿藥寮

壯歲揮金邁二疏眼看餘子伏鹽車芷蘭清馥渾紉佩  
芝朮新苗幾荷鋤剌作好詩傳近體誰言巧宦勝閒居  
北窓睡起琴聲寂便若身登太昊墟

蔡瞻明寺丞有詩見簡次其韻

漱芳傾液飽心胸久矣高名在郢中  
遂請叢祠方養氣卜居蕭寺且談空  
結交計入芝蘭室拓隱奚須桑梓翁  
妙語鼎來驚創見益慙白豕過河東

次韻李舉之立春四絕句

東皇先遣雪清塵一夜山川眼界新  
共喜太平今有象更兼歌舞為迎春

三冬文史總空虛獨有施行寬大書  
坐對南牆千箇竹

何妨留客煮園蔬

雪後疎梅正壓枝  
春來朝日已暉暉  
癡兒公事何時了  
一醉花前心似飛

他鄉春日思如何  
屏去茶甌任睡魔  
且得小窓成好夢  
片時江上逐烟蓑

次韻陳體仁惠詩并示遊山詩卷

人生名利場羈絆無休  
假沉迷雁鷺行夢寐雞豚社見  
謂遊子欺更防官長罵何如  
山中樂私窓肆嘉話陳侯

青雲客英聲蜚日下當年金馬門掉鞅示閒暇小試芙蓉池未整驪駒駕台嶽十日行繆蘿若相近來歸探古囊篇篇可圖畫傾耳金石聲鄭衛敢爭霸

得舍弟消息

倚闌春晝靜花柳自芳香消息三洲遠塵埃兩地忙鵲聲傳近喜鴻影憶初行抄得新書冊歸時補墨莊

次韻李舉之風雨中書事四絕句

挂壁鳴琴久斷絃強繙書帙本相便詞源顧我非流峽

藻思如今已揆天

雨勢風聲何太雄  
羣山答響亂賁鏞  
青奴今夕安用汝  
玉友此時留得儂

怒號通夕攪空虛  
好夢那能到玉除  
枕上泰然無一念  
只愁雨滴架中書

向曉登樓憑小欄  
蕭然歸興在江干  
癡兒未了公家事  
且把雲山仔細看

宿佛窟寺

籃輿登佛窟高閣望中清古木爾許蔭飛泉無限聲雨  
消今日暑雲作晚來晴獨對青山久相逢如有情

題景思水芝亭

遠意闊千雲亭幽不受塵來為池上客本是社中人影  
密龜魚蔭花開鷗鷺馴買山如遂志應許卜比隣

過妙緣寺聽懷上人琴

斷澗復危琴紅塵且滿襟疾祛避炎熱小憩得禪林煮  
茗對清話弄琴知好音秋風不借便去轍已駸駸

懷孫邦求

灑開桑落汎觥觥行子驅車恨不留雁塔自是丈人行  
麟臺更參儒者流官居二年有十月別思一日真三秋  
氷輪今已可人意何時來賞城東樓

摘星嶺

披山鑿道何嶮巖上摘星漢摩虹蜺七襄終日徃曾問  
一握去天今可躋叱馭已排蘿蔓去下車不復雲烟迷  
舉頭此際長安遠願借六翮凌丹梯

留別縣寮

滿城鼓吹出林垌  
珍重來思此日情  
共說棲鸞留政迹  
自憐展驥墜家聲  
一時官侶推儒雅  
百里民編樂治平  
山意川容若相挽  
不堪整駕問歸程

蔡瞻明以詩還行邑鄙卷次韻謝之

涼秋野趣已蕭騷  
方駕看山念我曹  
十日空歸才每下  
一篇來貺曲彌高  
詞華若我慚雌霓  
筆刀唯公掣巨鰲  
欲作歌詩興協律  
清朝今日有王褒

酬李舉之用前韻見寄

閱盡千峯不憚勞歸來文墨厭官曹  
浮槎問漢秋期近埋劍衝星夜氣高  
那復精思如吐鳳初無壯志欲乘鰲  
詩壇軒輊歸題品濫得陽秋一字褒

九日官舍種竹

獨整陳編對北窓烟雲渾欲助新涼  
庭前且使竹交翠籬下從他菊自黃  
遠宦只今同旅泊壯懷誰復問行藏  
攜壺已失登臨便不待微吟恨夕陽

天台道中

灘聲因雨急山勢向雲斜  
橘綠誰能畫楓丹遠似花  
春鉏懷淺水郭索上寒沙  
漸聽鳴梭近林中三數家

赤城

平生幾讀興公賦今日霞標對赤城  
此是南門入山路  
山祇乞我一番晴

玉京洞

飈輪曾此宅靈仙洞府今稱第六天  
規往不辭蘿蔓險

回看雲物起瓊田

國清寺

紺宇今方盛名知國已清  
萬松九里影雙澗四時聲  
杖策將窮覽巾車不計程  
登堂山更好人去曉猿鳴

清音寺

久坐俯潺湲流清詩思慳  
跳珠鳴蘚石淙玉下松闌此  
日耳塵靜幾人心地閒  
抽琴作新曲歸去要怡顏

禪林寺

振策快秋晴伽藍倚翠屏看雲不留瞬對竹已忘形銀  
地聲千載虹橋拱百靈至今鐘磬響如講淨名經

雨中宿萬年寺

夢回深夜耿秋燈泉竇爭流一味清過雁不留天外影  
寒松長送枕邊聲餐風可但久無賴急雨那能使寢行  
已問瓊臺雙闕路此心何必羨層城

閒主人覽衆亭

籃輿行盡白雲層來款禪居得小亭亂石引泉歸曲澗

寒風吹雨過中庭四旁野色朝昏別一覽巖姿遠近青  
宴坐蒲團作何想光陰不復問堯曩

桐栢觀

屹然雙闕峙瓊臺仰見彤雲郁郁開三井窮源知海眼  
六符乘象應天台松杉蒲道欣初過芝朮何年得自培  
更聽鳴泉雜風籟直疑笙鶴紫霄來

天台觀

芝田環拱碧崔嵬流瀑高從天際來飛沫有風長似雪

便覺仙都清晝永翻愁歸路染黃埃

劉阮洞

桃花當日未成蹊只有幽禽語翠微楚峽行雲空入夢  
秦臺鳴鳳要同飛仙家長若三春好人境何知萬事非  
訪問丘園荒舊迹却應回首悔來歸

明巖寺

路轉霞標外雲開綬帶前幾層山底屋一線竹間泉洞

口石孤聳巖頭峯倒懸故應風雨際行子總回鞭

寧國寺

幾日山南北端期汗漫游水痕秋雨過竹色曉烟收宦  
海何時了僧房為少留却尋歸去路餘興漫回眸

得景嚴弟書

往年同入洛此日各監州慣見浮雲改相思野水流有  
書將遠意何處話新愁莫為癡兒事乾螢蒲案頭

次韻錢處和連使郡齋晚集

風聲止雨歲云暮雪態魚雲晝欲昏  
共喜高軒歸別墅肯臨畫戟對清樽  
埋輪前事空豺路授簡英辭踵兔園  
是處梅花寢消息更憑玉藻為招魂

寄吳明可正字

歲晚仍多病春來尚異鄉  
愁城誰與破談壘漫相望  
體怯山風重心隨驛路長  
後亭梅若放為寄一枝香

憶梅呈曾宏父

重憶東城路盈盈十里梅  
彌旬阻風雪幾處雜塵埃  
已

是春移律何時酒泛杯好花那忍落直待使君來

題王氏秀野堂

飽聞居處好遠意快心胸樹接高低影山分朝暮容佳  
時能自適閒客幾相從勿訝題詩晚新來百事慵

除夜懷景嚴弟并寄景盧

遠鄉勞薄宦綵服共思親耿耿胸中事紛紛眼底塵與  
誰同別歲到此兩迎春獨有還家夢書窓一笑新

次韻曾宏父欲賞山宮梅花

黃堂清興動官梅遙望花林首屢回  
命駕許同狂客往  
舒殘頻有好詩催  
空懷月觀橫千影  
趁取山宮舉一杯  
為語東皇相假借  
莫教零亂點蒼苔

見招賞梅時范子芬欲行

翩翩畫戟對春光  
命客重登千仞岡  
坐上行人傾別酒  
花前小雨伴啼粧  
雪膚不為輕寒瘦  
玉骨何如昨夜香  
麗句競傳新樂府  
誰誇何遜在維揚

添竹

添竹果春力期君共歲寒青青懷特操碌碌媿麤官尚  
育哦詩日尤勝借宅看他時誰檢校何處報平安

送季元衡教授赴調

三年淹講席斗酒動離情此去登臺省諸公熟姓名驂  
騑看地絕鸞鳳為時鳴春日西湖上煩君一寄聲

題左遙功秀才桂香齋

小齋面蓬瀛昂霄得雙桂黃卷對聖賢欣然有餘地筆  
端妙言語挾此波瀾勢熒熒百鍊剛自是青萍罷衝星

不我識鉛刀且爭利於今修月手益振凌雲氣明年廣  
寒宮聲多都說似歸來八桂香浮丘挹仙袂

還李舉之太平廣記

稗官九百起虞初過眼寧論所失誣午枕黑甜君所賜  
持還深媿一瓶無

次韻向憲見贈三首

理財無管晏言利析秋毫吐論千人廢摩空六翮高未  
簪安世筆先佩呂虔刀楚澤東風勁寧辭攬轡勞

四望荒樓觀登高動土思山川相映帶桃李已紛披漢  
節人重仰黃坡世莫窺三章堆錦綉唐突古西施  
河東空有賦人不道揚雄貴賤雲泥隔夤緣井邑同平  
番依列宿談笑霽威風終賴帡幪力能成尺寸功

次韻向憲留題荆門惠泉卒章見及

對泉一洗心如水誦詩三歎頽有泚字比渴驥駸駸來  
文如翠湫鱗鱗起皇華轍跡環諸道濟物良籌載襟抱  
雙泉復見等故人竹馬兒童半羸老吾君豐澤要下流

慚愧長瀾力不侔一方始此一滴潤千畝長有千鍾收  
去瘼未盡惠未施可使剡玉生新瘕塵埃滿面語甚惡  
虛辱逢人說項斯

喜景徐作小圃因懷東閣二絕句

數頃澄湖練有光小亭處處得疎篁夢中春草多佳句  
一洗塵埃速寄將

白白朱朱手自栽兩年憶著滿林開莫教童稚輕攀折  
惜取濃陰待我來

欽定四庫全書



兩宋名賢小集  
卷一百四十八

兩宋名賢小集卷一百四十八

欽定四庫全書

兩宋名賢小集卷一百四十九

宋陳思編

元陳世隆補

盤洲集卷中

謝景高兄惠魚鱗

霜風激水蟹舍寒漁火獻俘清夜闌不烹五鼎若賒死  
使之骨醉尤加餐尺半之魚鱗六六同入糟丘隨小牘

鼎來魚味口流涎可使盤中食無肉潯陽從事姿南金  
高山調古誰知音寧同姬隅作蠻語生憎郭索多躁心  
檐頭雪消春有意洗殘開尊宜一醉持螯頗憶左手同  
尺素不妨時遣使

送唐左史紙墨

黃山奇峯三十六聳壑壽松多節目真工曲突埽芳煤  
介圭拱壁陳玄玉浙河千里茲濫觴萬穀之皮搖冰霜  
肌理細膩色白皙蜀網剡藤難雁行使君來自岷峨麓

曾賦客卿朝奏牘細字不作蠅頭書高文富有牛腰軸  
向來平步第一螭勇退宛在番之湄陶泓毛穎幸旅進  
快寫元和聖德詩

次韻董伯魯

讀破羣書有遠謀逢時便可動凝旒不辭巖邑千山險  
可作鈴齋十日留耕舌未容蠡測海歸心已夢蝶為周  
松門萬一逢佳友為說相如故倦遊

次韻黃子餘惠雙井茶二首

荻花風葉醉為鄉每憶臨分一鼎香枉費光陰驚老大  
略無治行媿循良歸心來往雞豚社清思消磨雁鷺行  
且喜絃歌餘樂地好詩句句挾風霜

峯橫萬仞臨雙井調護旗槍春怕深白雲有第鷹作爪  
黃梁無夢蝶何心聞名可信非虛語知味端如賞好音  
祇欠谷簾一杯水未能相就盍朋簪

次韻程觀過

山城寂寂簿書稀梅際春風一夜歸忽喜烹魚中有得

恍然揮麈久相違  
折腰豈愛蘄州竹  
問漢須尋織女機  
奇絕黃山待佳句  
何時小雨濕征衣

詹氏仁壽軒

修竹林林貫四時  
龐眉扶杖到期頤  
子孫長憶當年事  
留取軒楹客賦詩

闡陽驛二絕句

略略春晴天亦慳  
雷驚雨作轉頭間  
浮雲又逐東風起  
不見前山出髻鬟

觸石泉聲高下聞，曾將兩耳洗埃塵。  
相逢尊酒今誰侶，細草青莎是故人。

次韻施德初遊齊山

詩塵誰復數齊梁，小杜文章楚大邦。  
曾為黃花酬九日，至今陳迹擅三江。  
新亭高下依喬木，遠岫參差進曲窻。  
著履與君時茗飲，後車何必酒盈缸。

花信亭

解報花消息，江邊有好風。  
吹香四時別，問訊幾人同。  
梅

塢難藏白桃蹊豈借紅但能長檢校定不酒樽空

次韻馬上偶成

天遣祥風掃塞氛越疆輶傳禮儀新禦戎可鑒秦無策  
覘國誰夸鄭有人鳴鶴九臯聞徹響翔龍千載仰攀鱗  
垂鞭日日陪清話談笑成章泣鬼神

寒食遇雨

殊方遇寒食節物負年華小雨偏宜柳輕風未落花見  
錫如隔嶺對月共忘家俗重子推廟誰祠萬里沙

次韻得保州老張瓦硯

毛穎傳既成陶泓名不朽陳褚接武來論交篇籍固千  
年銅雀臺瓦解淪坤厚何人澄其泥頗能彷彿否龍公  
天上人金蘭幸同臭結束萬里行聯翩五旬久清談落  
玉麈痛飲盡金斗咳唾璣珠粲揮翰不停手窮邊得佳  
硯可出老呂有瓦缶莫雷鳴龍尾羞牛後

次韻楊花二首

桃花開落不同時燕子銜泥相伴飛若向章臺問春色

可無清淚濕征衣

官路風輕落絮迷  
望中高下襍游絲  
糝羶擬雪春無際  
只有騷人早得知

次韻中山雨後

好雨連宵鳩喚晴  
曉行襟袂有餘清  
遠遊朔塞殊風景  
夢到東阡看火耕  
紅退桃溪三月晚  
綠添麥壠一川平  
纖塵不逐車輪起  
喜聽驅驢叱馬聲

陳留聞鶯

恰恰啼鶯馬上聽凝雲欲雨曉寒輕滿郊碧草皆春色  
祇欠山光與水聲

南京道中

密葉成陰行路寬  
鳩鳴鶯轉足開顏  
半塗泥滑夜來雨  
數片雲飛何處山  
薄暮每尋尊俎共  
殘春能伴節旄還  
塵襟好濯西湖水  
偷取禪房一日閒

奇別景盧

禹穴遺書不可尋  
坐看綠葉再成林  
千巖競秀非吾土

三徑就荒勞我心誰是周人思  
召伯今無老叟出山陰  
台階穩上添花萼時倩來鴻續好音

次韻景盧野處解嘲之什

地偏不接市塵聲古木參天鶴唳清  
臺榭迴窮千里目  
詩章突過五言城花移瓊樹真無敵  
酒換金貂未足榮  
燈火歸時笙管作解嘲何事有歌行

答景嚴

向來戎馬沸邊聲曾出良籌助埽清  
六載倦遊潛楚澤

一枝同折記藥城北門西府仍班級後雁前鴻媿寵榮  
兩鬢星星吾老矣看君重上赤墀行

送朱叔召歸吳中

長憶吳中鳴櫓聲風高月上水波清  
曜菴掩映花成聚笠澤微茫烟若城  
十載相忘成夢想一帆此去喜歸榮  
老來無復蓴鱸會尚看驂騑得路行

隆庭竹至四絕句

憶昨分抄種樹書三荆今古美同株  
閒將草木供詩戲

待把漁樵足畫圖

竹里巧傳幽鳥語  
月臺高視客星移  
鄉園何幸三分鼎  
鳴鼓鏗鐘樂詠詩

斑籜遠移湘岸種  
貓頭亦是渭川孫  
百金得諾金無恨  
千畝封侯不在言

裝景松篁渾可喜  
忘機鷗鷺不相猜  
南窓情話有時盡  
喚取青州從事來

答小隱惠山茶

何處仙宮萼綠華  
鞭鸞獨御五雲車  
來從月窟曾依桂  
分種盤洲不碍茶  
枝耐歲寒  
屨換葉蕊藏朝霧  
錦羞花  
紅顏不逐東君老  
須著頻來鬪臉霞

答小隱聞野處開尊

遺我雙魚集棣華  
尚疑信馬誤隨車  
絲聲自是不如肉  
酒薄須知大勝茶  
翠袖明朝看倚竹  
蘭燈昨夜報開花  
飲闌獨步曾臺月  
古堞危亭見綺霞

園中觀種樹

望中赤葉漬霜華  
林下徐行便當車  
好處見山仍見水  
興來呼酒不呼茶  
旋移朱橘添盧橘  
更揀紅花間白花  
出郭最欣塵事少  
飽看孤鷺逐飛霞

答景廬咏道上新松

落落喬松說九華  
遠移霜骨想專車  
淪脂此地能和藥  
結實殊方却入茶  
村女拾釵分翠葉  
野人敲粉聚黃花  
脩然一徑窮芝嶺  
曉見飛雲夕見霞

野處送百結花

盤屈枝仍墊蔥青葉不稀雙銜疑鳳帶百結類鶉衣弱  
骨長連鎖輕腰孰解圍若教花自在應作綵雲飛

和景嚴咏冬開木犀

桂枝冬更好浪蕊到今稀雅韻催吟筆幽香傍舞衣月  
缺影風突百花圍倚策山亭暮寒鴟亦倦飛

和景嚴約賞木犀

簌簌蟾宮桂冬開自昔稀犀通一點骨密染六銖衣樽  
淥拚深酌爐紅漸可圍賞花宜卜晝莫待曉霞飛

許倩遣舟送花栽

雙舟十日涉長湖  
觥斛筠簋且百株  
可喜石榴初變白  
更驚玉茗不施朱  
臨風含笑勞花使  
映水分行擁木奴  
裝點園林娛杖屨  
好來一醉倒金壺

侶鷗亭

總策新亭上波光  
入座來魚遊能自樂  
鷗狎肯相猜  
風爽塵襟豁雲深俗駕回  
尋盟須日涉未怕落霞催

小隱芝草

芝叢盈百見聞希不數嘉禾連理枝紫蓋堆雲光點漆  
金莖蒙露色凝脂一時競秀園林勝十載深藏天地知  
急辦軒楹尊瑞物泥封詔墨有來期

紫薇花以六月至自漂陽在道已五十日今有花  
滿樹因示二弟

六月炎天千里移不期繁蕊便盈枝向來渾是西垣客  
憶得看花草制時

九日欲為雲松之集以病倦而輟

半秋翻藥裏九日負雲松黃菊從他好清尊不我同零  
丁憐敗葉旁午羨遊蜂今古登臨恨雲迷五老峰

景廬約賞朝天菊不克往

暮節真無分頭風祇自知朝天雖有菊向日不如葵久  
旱千株槁深秋百草萎吾哀亦相類飲興謝東籬

觀園人接花

植杖看園吏揮斤接果栽奪胎移造化類我借根芽一  
似雀為蛤能令桃作梅天工待人力信手便春來

雪後遊盤洲

書事斜川日月同行年過四逼衰翁縱情自洗和陶筆  
乘興誰開訪戴逢梅萼僅存難聚雪竹根未穩不禁風  
莫將野趣逢人說水上輕鷗西復東

上元日園中歸

春風環柳岸夜雨失沙痕剩竹期新笋移花護舊根身  
閒貪獨樂舌在戒多言是處無燈火荒涼一上元

次韻梁憲盤洲之集

輕風吹雨稱行春  
丘壑盈懷我輩人  
照水軒窓如進艇  
穿花旌節屢移輪  
攜壺迭講三杯酒  
揮塵曾無一點塵  
明日兵廚尋故事  
已教園吏拂華茵

再和

於越歸來三見春  
買山學圃狎漁人  
非嫌厚祿輕捐印  
所畏空餐詠伐輪  
時運可驚如過隙  
人生何苦不同塵  
明年此會誰重講  
唯把書郵問鼎茵

次韻梁憲再集盤洲

春風步履共優游自喜園廬匪拙謀羅列清樽資笑傲  
安排好語待賡酌茸茸香草裝三迳恰恰鳴禽想十洲  
玉節尋盟端不再便回天上近凝旒

送吳遠澤赴南宮

文壓秋闈掣桂華一鳴天陛穩乘槎歸來須踏盤洲路  
要看荷衣醉藕花

九曲有感

忽忽光陰轉駸駸華髮添迹陳三可歎心賞四難兼

歲三日挿柳

欲教垂柳匝池臺  
尋覓長柯處處栽  
待得成陰身益老  
攀條能有幾番來

朱叔召遺文官花

不用風人怨綠衣  
身兼魏紫與潛緋  
司花直為文官地  
寧忍春葩一片飛

解褐方聞上玉除  
寵光轉眼疊金朱  
大夫不博喬松貴  
加橘千頭也作奴

次韻景盧賞梅

曲塢梅藏白東皇解出奇不嫌歌板開直與酒尊宜倚  
竹盟三友凌風祭一枝清標何水部千古說能詩

三月十六日龜巢觀月渭師攜寵同賞後兩日大  
雨復作景盧有詩同其韻

潛鱗故故上鉤遲翠袖憑闌自一奇半夜醉歸閒有趣  
一年春晝事多宜盍簪何憚再三瀆覽鏡堪嗟六十癡  
已辦尋盟臨斫鱠不將可否問蒼龜

四月十三日流杯寄渭師

今年無好雨曲水未勝杯誰伴  
山翁醉難令俗客陪青苔  
迎馬入綠柳送鶯來縱步濠  
梁上垂緇更樂哉

流杯同景裴韻

三春少雨未行觴槐影交加更漏長  
半夜水來山澗滿四簷竹密酒樽涼  
新亭方作龜巢葉畫棟何妨燕語梁  
滿飲三觥拚一醉老來真個惜時光

庚子山居採茶有感

欽定四庫全書

憶昔采茶時雨後山蹊濕鷹爪喜盈檐蟹眼思朝汲歸  
路取盤洲下吳行踪急珠汗透裳衣更換登梯級徙倚  
曲闌干鳴雁圓沙集晚景不勝春寒氣潛相襲詰旦傍  
粧臺歌側人扶立興疾望賢來請煮青黏汁舉案念齊  
眉幻泡何嗟及重過故園門不忍攜筇入引領顧前丘  
空對旗槍泣

兩宋名賢小集卷一百四十九

欽定四庫全書

兩宋名賢小集卷一百五十

宋 陳 思 編

元 陳世隆 補

盤洲集卷下

次景裴席上韻

桃李紛紛已半春  
海棠睡覺晚粧新  
龜巢剩有千般景  
瓊報渾無一點塵  
酒未舉杯風逐客  
詩方拈筆雨催人

從今只揀晴和日  
草草杯盤勿厭頻

枕上示景盧

朱幡皂蓋有行期  
暮景無情惜別離  
枕席半旬乖語笑  
急風吹雨淚垂垂

南憩番禺北抵燕  
片帆西上駐荆門  
平生不作東甌夢  
荔子丹時念灌園

懷景盧

菖蒲節近暑風高  
棠棣叢疏月影交  
清夜不曾空鶴帳

浮生何幸老龜巢酒杯獨引今無侶書卷閒開共苦抄  
想得公堂鳬鶩退須懷西塢欠誅茆

排悶

數日雪兼雨凝寒懶舉頭出遊閒  
豹舄危坐索孤裘怕冷杯常執扶衰藥屢投  
滿園冰木稼天遣阿誰憂

答裴弟

棠隸成陰慰暮年困人春雪好長歎閉門終日詩頻和  
伏枕盈旬病未安已遣攜鋤移竹逕更思杖策整花欄

飽聞冰下遊魚躍所恨雙溪一笑難

辛幼安稼軒

濟時方略滿心胸卜築山城樂事重豈是求田謀萬頃  
聊因學圃問三農高牙暫借藩維重燕寢未須歸興濃  
且為君王開再造他年植杖得從容

紅梅

不謂天然白今同杏與桃玉肌添酒暈還是冠風騷

草堂

茸茸春草茁碧水映芳塘入夢無佳句看雲憶對牀

溪簾

雨過溪添綠橫瀾自在流水晶簾欲捲何處著銀鈎

人面竹

怪竒存法相妍醜出天真此君無二貌正是葛天民

慈竹

義居傳九世瑞物記三林何似同根竹春風一死生

梁子正有詩謝牡丹及聚仙次其韻

天教國色傲春華不肯爭先伍雜花  
西洛塵埃長太息  
名園今屬阿誰家

癡坐林間類守株  
一年春事已無餘  
且須九曲添清漲  
灑掃梭亭進一盂

玉蘂茸茸映四筵  
團圞如集飲中仙  
下方簇蝶非儔匹  
上比瓊花難並緣

病中憶九曲

新穿九曲望時霖  
水到渠成病已侵  
見說小舟穿柳岸

那知清漲入桃林  
五旬藥裏長經眼  
幾日荷花復賞心  
夢裏亦知行樂處  
老來尤更惜光陰

次韻景盧題龜巢

拙速誰前勝巧遲  
新亭結罷得能奇  
細看遠水兼天淨  
可但中秋觀月宜  
出郭自欣三徑樂  
枕流今有幾人癡  
巢蓮千歲同藏穴  
一笑泥塗曳尾龜

流杯次日連雨次渭師韻

入夏濃雲日夕昏  
舉頭烟雨暗前村  
風隨重客清葵扇

月為佳人射翠樽依舊建瓴歌屋角幾番攜杖失溪痕  
小枰已在紗窓下欲把明瓊看倒盆

再答

投老無能千慮昏歸田浸久使令村長因步月成三影  
難得披雲共一樽水漲溪橋孤釣隱雨侵山徑洗靴痕  
寓公在此寧黔突會有容光照覆盆

雨中排悶

飯牛戴笠牧童昏安得斜陽過別村戶外涎螭行半壁

牀頭渴鼠側空樽  
花殘鶯老渾無夢  
水到渠成不見痕  
天意未晴人未飲  
冢奴款曲辦粃盆

用景盧諸公詩軸韻招監司太守

淺白輕紅笑倚門  
何須雪夜憶前村  
韶光定入詩人句  
勝事難逢俗子言  
風振繡衣須命駕  
雲隨皂蓋欲窺園  
人生易老愁春老  
問柳尋花故事存

景盧數日枕席復用前韻

半載悠悠只閉門  
不知紅綠遍千村  
山川滿目供衰境

桃李成蹊出怨言可惜花飛聊洗殘何期雨作阻行園  
車公不出須重講檢校芳菲幽興存

答太守謝牡丹

華髮歸來不記春優游學圃傲江村已欣勝日臨千騎  
漫折香霞佐一樽對竹便當尋曲水藏花那肯效慈恩  
行厨若有真消息奔走畦丁急埽門

謝洪慶善提刑遺法帖

紛紛渴驥競秋蛇鐫鐙收拾俱名家吾宗尺牘擅天下

年來野鶩維肩差庭前書帶凝寒綠架上牙籤富新軸  
中藏墨妙更奇奇長物不留沾牘馥生平小楷拘蠅頭  
豈知蠅尾與銀鈎從今已辦筆成塚學奇還許登門捧

春思

自聞郊外景多病負年光沐雨桃容膩尋春蝶興狂幽  
期知我背遲日為誰長一枕虛窓寂爐烟續舊香

晚望

古堞高亭暮登臨遠眺時菊房棲白露荷蓋偃清漪遵

渚歸鴻集投林

缺

悲闕情聊繪句獨立自遲遲

客至

閉關聽剝啄有客款蓬蒿談壘萬人敵詞源八月濤園  
蔬供菜甲盤實釘毛桃冷淡琴書味由來屬我曹

送人至姑蘇

吳門千里役別話不堪聞暫發參商歎長懷星斗文菊  
叢黃彩亂槐路綠行分日冀書郵至冥鴻接暮春

答林神童

快靚終童英妙時  
蛩然銜袖出明璣  
家聲不詫大哉問  
文律何愁知者希  
益利鋒銑臨大敵  
養成羽翼看高飛  
紅塵可厭忙車馬  
挹取西山爽氣歸

瑞香花

袞袞香毬次第開  
結根幽獨謝紛埃  
芳容妒入鴛鴦社  
異馥清傳錦綉堆  
睡裏魂交非是衍  
醒時心賞可無猜  
品題蓋在春林右  
不是花王喜後來

讀秦本記

應侯一語幽宣后長信蒙辜徙葢陽秦室無親類梟獍  
借箕評語亦其常

侯生

淮陰束手大江閒誰信功成頗舌間不惜鴻溝分二國  
太平今日得生還

楚懷王

武關謀詐却稱臣冤魄游魂尚在秦墓木蕭條塚猶濕  
流聞其子作昏姻

讀戰國史

折足黥徒未易欺  
簣中死士亦何為  
魏齊斷首龐涓死  
禍報由來不可知

讀召公世家

齊晉瓜分四國王  
嬴秦為呂芊為黃  
大椎當日皆新主  
獨有甘棠澤未亡

穰侯

推轂曾聞薦武安  
威伸三晉走荆蠻  
廁中大疑圖攘奪

猶道藏兵不出關

田單

齊主輕忘在莒時鮮裘淄水遽相疑若無貂勃明勲業  
幾使功臣枉見夷

長平

一敗長平振古無趙邦臣主亦何愚當時已中馮亭計  
猶自區區遣鄭朱

春申君

珠履三千盡在門爭無國士解銜恩  
棘門難作無遺類  
死黨寧聞報李園

酬李舉之

象載凝華落筆工一時英妙蓋居中  
交情耐久惟同味  
詩意求新更鑿空揮塵寧談阿堵物  
聯珠不數躡嚚翁  
文成間故雞林得復有聲名到海東

次韻蔡瞻明登巾山

朝來爽氣冠曾丘急雨驚風正麥秋  
要得雲軒聊放目

何妨松徑暫低頭

多韁局促祇懷慙飄忽熙春月過三矯首白雲千里外  
此心無日不江南

好句聯翩見未曾品題今日欠鍾嶸登臨自有江山助  
豈是胸中不得平

夜飲藥寮次景思韻

主人知我樂郊居藥圃嘉招走尺書笑語池邊欣促席  
醉歸林下却肩輿正聞雁過援啼後更是風清月白初

見說長安消息近却須高興謝鱸魚

黃巖道中

兩日黃巖縣紛然有慮侵乍聽幽鳥語復起故園心冒  
熱度峻嶺憚勞休茂林潮來知海近三島可能尋

登寧和嶺

初識寧和嶺有懷占夢時聞詩千里隔斷織九京悲草  
木應相記烟雲渾異宜西風襲懷抱淚睫不勝垂

次韻酬丁致遠司戶

翰墨場中識面初  
珠璣粲粲似相如  
盍參多士登臺省  
却掾諸曹親簿書  
白社不妨閒紙筆  
赤城更好命巾車  
寸心渙汨方茅塞  
快讀新詩得剪除

賀子忱吏部抱膝菴

主人蚤歲抽華簪  
隱居時作梁父吟  
於今松窓在人境  
空有蕙帳留烟岑  
風來翠篠自搖玉  
秋著黃花仍散金  
拂拭塵埃記行役  
興來命酒還孤斟

石道士妙聲堂

泉溜古今同臨流萬慮空採芝歸絕嶂添竹映疎叢影  
漾高秋月聲宜深夜風真清長在耳何用撫孤桐

仙壇院

舊聞王子晉雲卧夜吹笙控鶴冲天去松風千古聲

贈護國昌老

緩轡到禪扃高談得細聽茗花汎輕椀烟篆度虛櫺門  
外雲千嶺軒中水一瓶我來無好語留此待丹青

寒巖寺

峭壁插青冥層巖覆化城中清磬發幽處慧燈明萬  
瓦足雲氣四簷無雨聲豐干不饒舌此地孰知名

曉發秦安驛

林夢不能曉起行山徑迷小車驚宿鷺列炬誤鳴雞冷  
覺霜華重光瞻斗柄西金庭有佳處芳桂想幽棲

次韻曾宏父探梅未開

梅枝渾待雪山意漸呼風欲索簷間笑那憂徑外窮莫  
詞窺玉潔拙句媿雷同只恐花開日綸言下法宮

招曾宏父待雪

欲把詩催雪先將酒送寒凍雲方作意微霰已開端目  
斷鄉城遠心驚歲事闌擬同今日醉待取玉花看

次韻范子芬雪中同訪曹功顯

明朝春琯欲飛葭臘裏重看舞雪斜筆下百篇非事業  
樽前一醉即生涯初疑高柳枉吹絮却伴寒梅好放花  
踏凍不辭方駕遠閉門留客更誰家

次韻蔡瞻明雨中書懷

梅雨冥冥晴復陰小軒終日起歸心自憐宦業初何補  
獨喜交情久益深憶缺微醺看錦瑟媿無好語比南金  
青山千里江南路它日郵籤幸見尋

茅軒

剪茅聊復爾步屨欲何之風捲三重去危簷護雀兒

兩宋名賢小集卷一百五十

欽定四庫全書

兩宋名賢小集卷一百五十一

宋 陳思 編

元 陳世隆 補

栟櫚詩集

鄧肅字志宏南劍沙縣人少警敏能文美風儀善談  
論李綱見而奇之相倡和為忘年交居父喪哀毀踰  
禮芝產其廬入太學所與游皆天下名士時東南貢

花石綱肅作詩十一章言守令搜求擾民用事者見之屏出學欽宗嗣位召對便殿補承務郎授鴻臚寺簿金人犯闕肅被命詣敵營留五十日而還張邦昌僭位肅義不屈奔赴南京擢左正言先是朝廷賜金國幣一千萬肅在其營密覘均與將士之數大約不過八萬人至是為上言之且言金人不足畏但其賞罰必信不假文字故人各用命朝廷則不然有同時立功而功又相等者或已轉數官或尚為布衣輕重

上下只在吏手賞既不明誰肯自勸今當專立功賞  
一司使凡立功者得以自陳若功狀已明而賞不行  
或功同而賞有輕重先後者並置之法上從之朝廷  
受爲命者衆肅請分三等定罪上以肅在圍城中知其  
姓名令具奏肅言無所隱耿南仲嘗薦肅於欽宗  
肅言之不恤上嘉其直賜五品服范訥留守東京肅  
言訥出師兩河望風先遁訥遂罷內侍陳良弼肩輿  
至橫門外開封買入內女童肅連章論之時官吏多

託故而去肅建議削其仕版而取其祿以給禁衛若夫先假指揮徑徙江湖者乞追付有司以正其罪因入對言敵人之巧在文書簡簡故速中國之患在文書煩煩故遲今兵戈未息豈可揖遜進退尚循無事之時欲乞限以旬日期於必至庶幾法嚴事簡賞罰之權不至濡滯肅在諫垣遇事感激不三月凡抗二十疏言皆切至上多採納會李綱罷肅奏論之觸執政怒送肅吏部罷歸居家紹興二年避寇福唐以疾

卒

分歲

餘臘羈人少共歡  
那堪飛雪集雲端  
四時欲盡三更漏  
六出翻成兩歲寒  
壓損嶺梅殘  
豔薄敲殘亭竹碎  
聲乾  
公卿休埽黌堂下  
留與來朝執玉看

別陳少卿

平生杯酒百無憂  
四海風流說太丘  
礪景筆端陵鮑謝  
當年門下得伊周  
那知避世巖巖迹  
也許從公汗漫遊

聞說片帆今又舉三山無處著人愁

戲洪丞

萬里歸來雲水鄉逢春得酒且徬皇  
好賢誰侶雙松吏使我終時一石狂  
忽與高唐來鼠目却令朱戶鎖梅妝  
先生取瑟吾知己安得從今不舉觴

大雨

夜夜陰雨如潑墨雨勢欲挽銀河竭  
春工十八落泥塗驟雨誰云不終日  
魏紫姚黃業已空嬉遊何足介心胸

只恐年年禾黍地浸淫盡入陽侯宮憑誰為我呼少女  
埽空陰翳開天宇光風霽月暖層霄坐令六合同歌舞

寒梅上李舍人

窮山觸目紛茆葦此意昏昏誰可洗竹間橫破一枝梅  
對月嫣然耿寒水吟詩索酒滿高堂穿簾的皪射晶光  
世上羶葦來不到翦翦天風吹冷香人言百花睡未起  
獨冠羣芳差可喜珍重和羹自有期行事爭雄壓桃李

題梅齋

江邊蘆葦風颼颼東君一點破寒愁窗間疎影橫春瘦  
枕上冷香尋夢幽夜深竹折驚殘雪捲簾醉起千山月  
洗空肺腑龍麝腥落筆天香闕清絕

上先生

夜馬踏殘月荷策來泮宮入門見先生語意何雍容短  
檠挑燈一千夜高談雄辨流曾中吾皇求士若飢渴那  
許先生久卧龍玉鞭斜指長安市小軒從此冷如水空  
留絳帳照孤燈窗外西風起寒葦

龍興避難

傍山怪石如蹲虎絕頂去天無尺五却披叢棘下山腰  
丹碧照空飛棟宇道人蓬戶歷塵勞避世祇嫌山不高  
那知行空老曼倩竊食當年王母桃松檜參天門晝閉  
碧玉擷蔬飯炊雪百年冷坐無車音一旦偕來真惡客  
當知喧寂豈殊觀出世何妨在世間能致吾人師作古  
龍興今日始開山

送丹霞禪師

山壓濃陰勢欲頽，  
荷香推車振不開。  
君來論詩風四起，  
挽出羲和照九垓。  
別居八年驚電掃，  
霜髭已失童顏好。  
逝者任從造物流，  
吾人一笑初不老。  
明朝飛錫過平津，  
浩歌歸耕隴上雲。  
巖實不應藏一滴，  
要須化作無邊春。

再用南齋韻謝

沙溪清可啜，遠山翠欲流。  
翩然航一葦，浩歌入蘆洲。  
高堂上木杪，幽人事勝遊。  
但足簞瓢樂，不知天地秋。  
我輩嗟無口，冥搜空掉頭。  
何如三才傑，等是濟川舟。  
開卷騰

光怪天上卿雲浮阿雲又嗣音吾研不欲留平生浪詩  
名寒蟲號清幽已對狂道士從此敢吟不

過霹靂灘

門前又見馬如流兵革紛紛幾日休嶺似車盤方稅駕  
灘如霹靂更行舟豺狼敢侮乾坤大江海徒深蟻虱憂  
安得將壇登李郭挽回曦馭照神州

諫花石綱十一章之七

一章至四章已失

皇帝之園浩無涯日月所照同一家北連幽薊南交趾

東極蟠木西流沙

是中日月磨星斗下視羣山真培塿千年老木矯龍蛇  
天風夜作雷霆吼

三月和風塞太空天涯海角競青紅不知花卉何近遠  
六合內外俱春容

聖主胸襟包率土天賜園池乃如許坐觀塊石與根莖  
無乃卑凡不足數

飽食官吏不深思務求新巧日孳孳不知均是園中物

遷遠而近蓋其私

恭惟聖德高舜禹一圓豈嘗分彼此世人用管妄窺天  
水陸馳驅煩赤子

安得守令體宸衷不復區區踵前蹤但為君王安百姓  
天地一圓樂何窮

咏桂

雨過西風作晚涼連雲老翠入新黃清風一日來天闕  
世上龍涎不敢香

西巷錢春

傍水禪房半掩門，乍晴簾幕捲黃昏。  
風驅紅杏春何在，酒入香肌玉自溫。  
勿笑飢腸充笋蕨，須將醉眼蓋乾坤。  
杖頭更有百錢在，明日還尋未到村。

寄朱韋齋

歸帽納毫真得策，要牋留帶計還疎。  
公如買菜苦求益，我已忘腰何用渠。  
閉戶羽衣聊自適，推窗柿葉對人書。  
帝都聲價君知否，寄付新傳折檻朱。



兩宋名賢小集卷一百五十一

欽定四庫全書

兩宋名賢小集卷一百五十二

宋 陳思 編

元 陳世隆 補

撫松集

呂愿中字叔恭紹興中知靜江府

環珠洞

朝野樂昇平園林窮勝討快雨洗塵埃秋山淨如埽游

欽定四庫全書

兩宋名賢小集  
卷一百五十二

魚聚江灣飢鳥集木杪羣芳鬱崢嶸一水翠縹繞雲頭  
蒼狗變龍蛇亂天矯巖洞真竒崛造物逞天巧近在堂  
輿間超然類三島暫舍簿書忙何時脫紛擾靜聽黃鸝  
鳴一聲還復悄纚維去咫尺步步即幽窈新岬暗蒼苔  
喬木蔽蘿蔦山腹有遺祠隱然見華表筍輿訪崇臺空  
曠遊遐眺八桂困焦蘇歎息心為愀任侯三蜀秀冰壺  
湛春曉有樂駐朱顏可以長不老雄篇頃刻成舉座悉  
稱好戛玉副鳴球士夫善傳道五嶺類觀東一覽衆山

小呂巖何興廢事固有前兆新詩刻翠珉異日可稽攷  
玩珠紀勝遊聊復醉清醪

遊東觀

郊原同按轡杖屨陟青冥山色混林樾溪光照斗星螺  
峰高插戟兔徑曲穿庭闕一聲遠千品特地青

訪顏氏讀書巖

洞口微雲恣卷舒石巖相對一蘧廬賦才晉宋多夷曠  
好景古今難貯儲茗椀已驚浮雪浪齋厨俄聽響鯨魚

欽定四庫全書

兩宋名賢小集  
卷一百五十二

子雲識字終何用且讀人間未見書

假守呂叔恭游中隱巖無名洞坐客鄱陽朱國輔  
云此洞未有名因公而題欲名曰呂公巖予未敢  
披襟而劉子思陳朝彥皆曰甚當戲書五十六字  
鐫於石壁間紹興甲戌季春七日

護田綠水轉山樊滴翠羣峰列巨杉洞外僧藍侵斗漢  
澗邊人跡隔仙凡深深雲谷春常在寂寂松扉夜不緘  
此處得名爰自我要須題作呂公巖

郡守呂叔恭以甲戌季春七日遊中隱名山水膏  
肅之興未已後兩日再拉機宜劉子思監州朱國  
輔經屬陳朝彥同至新洞所見愈奇真所謂倒餐  
甘蔗聊書五十六字

爽塏虛明小洞天巉巖垂乳類鋒鋷薰風習習來三面  
夏雨蕭蕭欠一檐指顧羣山勞應接徘徊歸騎縱觀瞻  
門前綠水泓澄淨底處應須是谷簾

華景洞

斯洞名華景纍纍乳石懸虛崖疑月窟絕頂瞰江湍巖  
底金仙寺峰頭玉井蓮地形居衆外氣象偉無前徙杖  
觀初月歸興觸暝烟蔽林排翠幄封徑簇花鈿爽致資  
清賞鐫題記昔年猿啼聲應谷雲破月侵筵策蹇追華  
駟鳴鶻指墜鳶誰人能畫此為倩老龍眠

北牖洞

南窗聊寄傲北牖有涼風巖洞幽深處結茅容老翁

嘉蓮洞

暮暮烟雲鎖洞關  
旁開六戶類連環  
芙蓉未是仙家瑞  
更約同登太華山

朝陽洞

半世觀山鬢已皤  
欲求釣艇老漁蓑  
杖藜又過烟霞洞  
聞說當年爛斧柯

白雀洞

洞中石燕可長生  
白雀何因浪得名  
無限好山難買得  
世間奚用孔方兄

夕陽洞

怪底浮屠不宿桑直搜巖竇意徜徉洞中日月未嘗老  
何事仙家有夕陽

南華洞

亂崖深峭水淙幽六夏來遊儼似秋安得遽遽一覺夢  
倚巖栩栩訪莊周

假守睢陽呂愿中叔恭機宜祥符劉襄子思通守  
鄱陽朱良弼國輔經屬建安陳廷傑朝彥因祈晴

乘興遊中隱巖留題以記勝游

坎止流行但信緣  
嶠南風景異山川  
偶因乘興穿山腹  
始悟壺中別有天

劉仙巖

平湖小隊出郊墟  
盡日登臨據隼旟  
聞道仙人尸假去  
尚應猶學世間書

題元巖

翠律倚空蹲怪石  
輪囷夾道卧長松  
白龍應已冲天去

嚴實歸然有故蹤

兩宋名賢小集卷一百五十二

欽定四庫全書

兩宋名賢小集卷一百五十三

宋 陳思 編

元 陳世隆 補

方舟詩集

李石字知幾資縣人負文學有盛名於蜀紹興間為校官乾道中為郎歷秉旄節趙雄不善石以是晚益困有方舟集七十卷

禮殿

蜀侯作類錦水湄先聖先師同此室巍然夫子據此座  
殿以周公名自昔聖人兩兩如一家均是周人先後出  
東家想見終夜夢猶與公孫同衾爲斯文授受乃闕天  
不為漢唐加損益我時來視豆俎事重是漢人斤斧迹  
漢宮制度九天上散落人間此其一多因豐屋起戎心  
獨此數椽綿歲歷規模嵒嵒東魯似氣象縹緲西岷敵  
竹松猶是斯干詩風雨方知棟隆吉雖然漢獻來至今

閱時已多駒過隙中間豈無鳥鼠慮妙斷不知難輒易  
工師不揆亂如麻敢向殿門言匠石詩書譬彼尚闕文  
後學如何補遺逸祖龍非意竊登牀蚪蚪有心來壞壁  
舊章僅在命如絲誰勒吾詩勝丹漆

左右生題名

蜀地雖遠天之涯蜀人只隔一水已自從文翁建此學  
此俗化為齊魯家類林春風桑樞熟集鼓坎坎聞晨撾  
諸生堂與分左右相比以立如排衙九牧之金充歲貢

缺

松下吟哦幾唱酬却攜螭蟹錢監州穩挑書擔去環碧  
頻寄詩簡來雪州異姓弟兄千里月故山泉石一天秋  
葛峰隱者如相問為道瓜侯已白頭

題環碧亭

十里連漪陸瑁湖一亭幽絕重先居雲根數朶排青闥  
泉沫雙流濺綠裾竹鎖斷橋飛雁驚荷侵涼檻蔭龜魚  
洛園還許人同樂時向林間望小車

兩宋名賢小集卷一百五十三

欽定四庫全書

兩宋名賢小集卷一百五十四

宋 陳思 編

元 陳世隆 補

嘉禾百咏

張堯同嘉興人有嘉禾百詠

晉山

馬革浮屍去君王太忍人此山空廟貌何以勸忠臣

爰山

丹竈功成後寥寥掩竹扉但聞蟬已脫不見鶴來歸

澎湖

四境田相接烟瀾自渺瀰客來吟此景無或比澎池

鴛鴦湖

東西兩湖水相並比鴛鴦湖裏鴛鴦鳥雙雙錦翼長

長水

古來名未滅人好水還清一讀高僧疏塵勞悟此生

谷水

一作許尚詩

短棹經行處風披藻荇香中宵孤鶴唳片月在滄浪

天星河

拍岸浮春綠菰蒲四遠生網羅人不到魚鳥亦忘情

穆溪

靜練明田外源流笠澤通不因逢歲旱誰識濟時功

韭溪

終與雙溪接分流入郭來市橋人影合不解洗塵埃

雙溪

柔櫓聲相應名齊漢魏收可憐一溪水分作兩塘流

秀水

好景明於畫長浮五色波一竿吾欲釣來此聽漁歌

白龍潭

呼吸風雲合飛潛自有時只愁潭底淺頭角被人窺

樂兒

用此臨吳戰何人為越謀夫差曾不寤亡國始知羞

范蠡湖

少伯曾居此螺紋吐綵絲一奩秋鏡好猶可照西施

梧桐涇

落落梧桐樹何年作鳳鳴試看千古翠流盡一溪聲

汾湖

我是滄浪叟閒來繫釣艘如何一湖水半秀半吳江

柘湖

神居陰陽護尋國捍洪波莫慮蛟龍怒年來畏叱呵

馬塘涇

疑著風波惡民謠亦畏人築塘成堰後斬馬祭河神

杉青堰

舊吏家何在空尋古柳隄世情今亦爾莫笑買臣妻

鳳凰洲

竹秀水色淨忽來雙鳳凰岐周昔鳴瑞今復見文王

龍舌頭

一吸長川靜烟雲忽有無誰看額底月誤欲探驪珠

月壕

入徑深於塢滄波近馬蹄每尋蓮社友咫尺走東西

靈光井

玉甃祥光發難藏世上名定多慈護力一飲百疴輕

幽瀾泉

神女鍾靈處真堪療渴羌滿甕秋玉色一酌灑清涼

槁李城

螳螂方捕楚黃雀遽乘吳交怨終亡國君王到死愚

射襄城

此地連江海曾經古戰爭干戈今不見空有射襄名

四城

吳越爭雄日區區在用兵空餘爭戰地無處不高城

何城

報越心何壯貪齊計已輕忠言殊不聽何用築斯城

由拳廢縣

故城人不見擊劍淚空霑一絕悲聲遠今猶說孝廉

嘉禾墩

寂寞黃龍後紛然壠上碑廢興無處問空咏草離離

古戰場

自昔干戈地城空草自荒漁樵懷舊事何敢議興亡

村門口

昔日荒閒地今聞市井喧人情看促迫無復似當年

宣公橋

祇因裴少保功業敗垂成往往橋邊客今猶恨未平

五柳橋

為懷陶靖節無復見其人誰種橋邊柳猶含舊日春

百步橋

舊址依然在荒墟未百年還分一橋水流入幾家田

跨塘橋

路接張涇近塘連谷水長一聲清鶴唳片月在滄浪

菩薩橋

片雲初出岫南北自飛揚舊日橋邊路猶聞鳥履香

竹橋

腰枕政亭北橫斜古渡頭風吹雙淚落恨逐水東流

河內亭

掾死緣非命兒來哭未休舊時亭下淚疑與水長流

嘉禾亭

五馬來何暮經營指一彈石碑書近事留與後人看

列岫亭

吾州風物好惟是欠青山忽有洞庭色來從一笑間

水心亭

波光磨不盡鏡面絕纖塵照得紅亭子亭亭似美人

樂郊亭

竹下清風好時來挂幅巾待逢田叟問知是樂郊人

會景亭

有景道不出須來此水濱十分花鳥色團作一亭春

南塢

岬回波曲曲城轉草層層忽見桃花落還知到武陵

海棠亭

蘇砌迎烟渚花開忽滿株春風吹爛漫如展蜀川圖

白蓮沼

滄波圍四面艷艷玉開花自可除簾幙清香不用遮

桃花亭

不待東風拆池塘已自春試看原上客猶恐是秦人

紅薇逕

漸放秋風晚花無爛漫香淺深紅似錦散影在滄浪

茶溪

茶林那復有零落付樵人  
舊日溪邊叟空悲二月春

仙鶴亭

杳杳雲間路重重隔翠林  
數聲清夜後來伴月邊吟

芙蓉塘

一發連千丈紅雲出素波  
秋風吹欲老無奈落花何

白苧橋

遍隴敷青綠桑麻共幾家  
滿城羅綺子應笑不栽花

漁漁

野水連天濶滄波引釣緝寄言溪上叟莫學直鉤人

懷蘇亭

猶使樽前客常懷沒後名好風吹遠籟如有笑歌聲

披雲閣

茲樓當勝地高望極峻嶒欲覩青天色還須上一層

景龍樓

千秋傳異綵百尺護雕闌欲識金龍瑞丹霄試仰看

烟雨樓

妙手誰烘染  
梳烟沐雨姿  
一聲長笛晚  
人在倚樓時

月波樓

天濶冰壺淨  
溪平玉鑑寒  
卷簾看晚色  
鷗鳥並闌干

真如院

田家輕脫屣  
聊結淨人緣  
影外香燈寂  
清風百世傳

雪峰庵

一語合領悟  
師承豈在身  
戲言廬墓客  
未是報恩人

景德禪院

白毫光未滅勝事百年中  
好是傳燈地林泉有古風

三塢

石匱埋神物靈光照夜多  
龍歸天上後無復更風波

學繡塢

孤塔峩堯立猶傳學繡人  
五湖如好在針線不勝春

水陸院

白晝重門寂蒼苔古殿深  
老僧香火罷松柏夜森森

泗洲庵

舊寺丘墟後重興歲月賒莫將間禍福容易託僧伽

雲門家舍

滿篋藏鋒句家傳世幾何遠孫無悟解却笑葛藤多

白蓮上方

古屋深于洞門前種白蓮好尋當日社重結此生緣

普濟院

祇應曾布地往往化為魚一遇丁千騎禪人便結廬

兜率寺

昔年池滿地今見屋耽耽不結蓮花界龜魚死未甘

姜庵

不入紅塵市安居三十年至今庵下路芳草碧芊芊

惠明堂

地僻無人到松風鶴夢清一燈禪榻畔自向暗中明

三過堂

題詩三過此坡老昔時曾悟得成禪指來為打睡僧

寂照庵

寂滅跏趺地燈光照四時高僧穿地脉此意少人知

天慶觀

寥陽龍已化華表鶴空悲欲問梁朝事惟應老檜知

福順廟

老屋無丹牖空堦只翠苔遠檐看箭鏃誰記赤眉來

昌武廟

祇因吳士季千載仰公神欲借驅疔術來臨刻木人

楊姑廟

孝德襄陵久天然與衆殊坐男不能養應合愧楊姑

徐偃王廟

王有岐夷德千年貌亦存我懷三刺史誰是後來孫

曹使君祠

一笑淮兵却功成未易論豈慚顏刺史詩酒在平原

高使君祠

一暝移藩日邦人昔被恩步兵碑尚在功業敢經綸

寥陽殿

人歸天上去空識舊衣冠  
秘錄藏金匱清風滿殿寒

霍將軍廟

弼漢功非淺讒夫可奈何  
海神今亦畏安敢布風波

讀書堆

一作唐  
詢詩

平林標大道曾是野王居  
往事將誰語淒涼六代餘

簡齋

詩老追唐句閒居築簡齋  
芙蓉寒浦外紅落感秋懷

陳賢良隱居

發策名猶在回頭事已非池塘春草綠空憶謝公歸

徐長者園

丹砂猶未就白髮忽成翁却有憐春意栽花向此中

趙老園

藏書幾萬卷歸老此林泉不為尋鱸子公亦有賢

施墓

蒼苔侵壞道晚雀散空林莫問人賢否浮生一古今

衛墓

惆悵黎陽客飄流浙水濱定忘空腹恨知是赤心人

劉伶墓

荷鍤從吾後叮嚀死便埋人皆譏嗜酒我獨愛忘懷

嚴忌墓

有子如君少終緣叛國亡家前無後嗣切勿怨張湯

朱買臣墓

世事春風轉榮枯一夢間繡衣人不見孤冢舊家山

周都官墓

不識君名字應難問子孫一丘浮水際神怪欲誰論

蘇小小墓

泉下骨應朽幽魂獨未消幾番清夜月孤影度南橋

羞墓

傷哉負薪子五十始登朝空使埋羞處山花復採樵

木紋觀音

雙瞳分日月眉際一星懸照見人間苦三辰不在天

邦樂王龕

父老懷遺愛誰傳肘後方藥囊同日葬空憶紫元香

淨相佳李

地重因名果如分沆澹漿傷心吳越戰未敢盡情嘗

符浩瑞竹

幅霜縑外青青出自然天機何敢議珍重白衣仙

兩宋名賢小集卷一百五十四